

欽定大清會典事例

欽定大清會典事例卷一千三十八

都察院

五城

官員赴任  
書吏役滿

廢員回籍  
驅逐游惰

鄉會試禁約  
點那

禁  
因積

官員赴任。○康熙六十一年議准。凡補授外官領憑後。交都察院轉行五城司坊官嚴查。如有在京久住。不依限赴任者。即報部題參。○雍正五年定。凡在京補授知縣以上官。自奉

旨之日起。限十日內給發文憑。給發之日起。亦限十日內。交都察院轉行五城兵馬司指揮嚴催。照

限令其赴任。

廢員回籍。○康熙二十九年定。凡京官革職。休致解任。該部知照各原籍督撫。仍移咨都察院。轉付五城同坊官嚴催起程。將起程日期報部。○三十年議准。除革職提問官。照例勒限驅逐回籍外。其餘解任休致。丁憂等官。聽其自便。○

雍正三年

諭。凡旗員革職離任者。皆勒限歸旗。康熙二十九年定例。漢官革職離任者。照旗員例勒限回籍。嗣後陸續條陳。前後更改。且日久廢弛。奉行不力。嗣後凡漢官

革職於任內事結之後。即勒限令其回籍。若有逗遛任所。以及潛住京師。遨遊他省者。照例治罪。其擅自容留之五城及各地方官。亦分別處分。至朕從前曾令革職解任官。或有冤抑。赴都察院申理。嗣後如有此等人員。著於本地方取具文書。然後來京。事竣之後。仍發回原籍。不得藉端留滯。著該部議奏。欽此。遵旨議定。凡京官革職。曾經問有罪名者。限一月內起程。五城司坊官將起程日期報部。並知會原籍地方官。照旗員歸旗例。依限回籍。儻違限不即起程。及逗遛中途。並回籍遲延。違限一月以上者。

都察院及該督撫題參。照旗員例治罪。如該管文武各官。或不於限內催令起程。或潛住京城。五城司坊官。專汎武官。不查出驅逐。皆照容留旗員例議處。其革職解任廢官。或有冤抑。赴都察院具呈申理者。先具呈本地方官。轉詳督撫。給咨來京。事竣之日。都察院轉行五城司坊官。發回原籍。仍知會原籍地方官。如藉端留滯。照例治罪。五城司坊官。徇情容留者。照例議處。○乾隆四十五年奏准。嗣後凡有外省人員。因公到京。以患病告請回籍者。吏部即飭令在京司

坊官詳加驗看。如果屬實。即行開缺銓選。

鄉會試禁約。○康熙十七年議准。凡遇鄉會試之年。場前榜後。如有私書匿名紙帖。揭於街市。或編就歌謠。豫為傳播。計圖陷害他人者。在內巡城御史五城司坊。緝拏治罪。○雍正四年

諭。科場關繫大典。若聞中間卷果有不公。許應試舉子親身赴都察院控告奏聞。若不軌之徒。假捏汗蠟之辭。以洩私憤。而撓公事。則國法斷難寬宥。著五城御史等密訪嚴拏。即行叅奏。從重治罪。○乾隆元年

諭。鄉會試儻有場前鑽刺。豫報元魁。及榜後生事。捏造

歌謠為人心風俗害者。五城御史訪拏治罪。○二年  
議准。向來下第舉子。每於場後藏匿姓名。編造  
謠歌對聯。任意誣捏。黏貼街衢。最為不法。應令  
步軍統領。順天府五城御史。出示曉諭。如有違  
犯。卽行嚴拏。○六年

諭。今鄉試在邇。聞不肖士子。故智復萌。賃倩善寫細字  
之人。鈔錄文藝。為人場夾帶之具。著五城御史出示  
曉諭。密行嚴拏。○又議准。武闈難保無雇寫細字策  
論之弊。應照文場之例。令五城御史出示曉諭。  
密行嚴拏。○九年奏准。凡鄉會試。坊間擬表。刊

刻發賣。令五城御史出示禁止。○五十二年議  
准舉場附近地方。近科以來。聞有積慣姦徒。窩  
藏槍手。專為場內代倩文字。而不肖舉子。向通  
外場巡綽兵役。及闌中號軍。將題目走漏消息。  
用靛塊等物。擲出場外。及至文字作就。或遙點  
鎗竿。連放爆竹。或將馴養鴿鷄。繫鈴縱放。作為  
記號。豫行指定地方。以便關通接遞。仍用靛塊  
等物。擲入場中。最為積弊。應交步軍統領衙門。  
屆期選派番役。會同五城順天府密訪窩留槍  
手之家。查拏治罪。並於考試日期。凡附近居民。



有遙點鎗竿。連放爆竹。及縱放鴿鷄。拋擲甄塊等弊。即嚴行拏究。並豫先出示嚴禁。以杜弊端。

○道光十一年

諭軍機大臣會同禮部都察院議奏給事中王雲錦條陳請禁書肆小本一摺。此等不肖惡習。朕亦素知。若止出示嚴禁。令其自行銷毀。仍屬有名無實。著各直省督撫順天府五城步軍統領。明查暗訪。將書肆小本板片。概行銷毀。該胥吏等亦不得藉端訛索。其貢院左右。除向有書鋪。仍准開設外。其臨時開設者。概行斥逐。如有公然售賣小本文策者。枷責嚴辦。並責

令外巡緝官嚴密查察。有犯必懲。儻士子尚有不知檢束。懷挾傲幸者。即著斥革究辦。其恃衆逞強不服約束者。加號示衆。儻控檢番役吏胥人等。有意栽害者。重治其罪。

書吏役滿。○康熙三十八年定。凡部院衙門書吏。五年役滿考職。一經出榜曉示。即令五城司坊官嚴催回籍。取具地鄰一月內起身甘結。並司坊官印結報部。儻有潛住京城。不行查催。將司坊官照容留廢員例處分。○雍正元年奏准各部院衙門盤踞書吏。除拏獲者已遵。

旨遞解原籍外。仍飭五城司坊官不時稽察。如有潛匿京城或遞回私自來京者。並拏送刑部治罪。嗣後考滿書吏各部院移咨都察院。令五城司坊立押回籍。毋許逗遛。如司坊官不行嚴查。一併叅處。又

諭各衙門募設書辦。不過令其繕寫文書。收貯檔案。但書辦五年方滿。為日既久。熟於作弊。甚至已經考滿。復改換姓名。竄入別部。姦弊叢生。更有一等缺主名色。掌握一司之事。盤踞其中。交通賄賂。上下朋姦。書辦尚有更換。缺主總無改移。子孫世業。遂成積姦。自

後書辦五年考滿之後各部院堂司官查明勒令回籍聽選。如有逗遛不歸者。飭令五城司坊官稽察遣逐。其缺主倚恃勢力抗違潛匿者。刻即參究。押解回籍。各部院一年一次保結具奏。儻仍有潛居京師者。或經朕聞知。或被科道題參。將出結之大臣官員一併治罪。○十二年議准。各部院衙門役滿書吏。於考定職銜後。即由五城司坊官限一月內令其回籍。儻司坊官將冊內有名之人不行催令回籍。容留京城。並復行來京潛住。將司坊官照例按名數分別議處。其各部院衙門責革書辦亦交

與該司坊官嚴催令於一月內起程回籍。並行  
文本籍地方官嚴行管束。如潛住京城將司坊  
官亦照例議處。儻實係失於覺察以致役滿逗  
遛。或業經催令回籍復來京潛住者。照失於覺  
察例罰俸一年。其籍隸大宛二縣者。該縣將各  
役年貌住址三代墳墓造冊送都察院。令該城  
御史按冊確查。果係本京籍貫。有墳墓房產可  
據者。仍准居住。非實在大宛籍貫。如有潛住招  
搖等弊。經該御史查出。將濫送冊結之知縣。照  
造冊舛錯例罰俸一年。如該城御史不行查出。

一經發覺。將從前失察之御史。照不行詳察例。罰俸六月。○乾隆三十四年。奏准嗣後在京簡缺書吏役滿時。即由各衙門自行考試。庶頂替代倩之弊。無可復施。試畢。即知照都察院。將該吏飭令回籍。○三十六年。議准各部院衙門年滿書吏。除在館行走承辦則例。仍留館辦事。俟館務告竣。飭令回籍外。其餘役滿書吏。若不遵例回籍。仍復在署辦事。立即逐出。發回原籍。儘數日久。潛居京城。出入衙署。一經查出。交部治罪。所有失於查察之該管官。照例議處。仍行令

都察院五城御史嚴飭司坊官不時稽查。倘有徇情故違。不即據實舉報。查出。一併照例議處。

○嘉慶五年奏准。在京簡缺書吏供事役滿。由各衙門自行考試。授定職銜。吏部彙明。將執照發交本衙門。傳令收領。該衙門即將書吏姓名籍貫。咨送都察院。轉交五城司坊官。勒限一月回籍報院存案。仍行文原籍督撫。轉飭地方官。將到籍日期報院備查。至內閣即用供事。及各部院衙門繁缺。即用書吏。於役滿後。該衙門出具考語。咨送吏部掣定職銜。照例行文。該衙門。

飭令回籍。即將該書吏姓名籍貫造冊咨送都察院轉交五城司坊官限一月內令其回籍。儻司坊官不行催令回籍容留在京並復行來京潛住將失察之司坊官按依名數分別議處。

二十二年

諭各部院衙門書吏藉端逗遛者著步軍統領衙門及五城一體嚴查勒令回籍毋任潛匿京師招搖舞弊。

○二十五年

諭各部院衙門書吏已革者不准復充已滿者不准逗遛立法本為周密若姦胥猾吏仍於暗中盤踞不免



有舞文弄法之弊。著步軍統領五城順天府一體訪查。如有已革已滿書吏把持公事者。立即嚴拏究辦。其各衙門書吏缺出。並著遵照定例。按限遴充。毋令姦徒身後辦事。以除積蠹。○道光九年奏准。各衙門書吏役滿後。隨時行知順天府五城。勒限回籍。其充役將及五年。無故具呈告退者。亦著督飭回籍。儻有役滿後改名冒入大興宛平籍貫。捐納職官。並戶部捐納房役滿貼寫。一併嚴查。照例辦理。不准在京稽留。以除積弊。○十年議准。已滿書吏。逾限不即起程。及半年不到原籍。潛

行來京。分別革去職銜治罪。司坊官分別懲處。告退革退之吏。勒限回籍。五城司坊官督率總甲。認真查報。冒籍太宛兩縣者。役滿令歸原籍。其籍隸大宛者。不准充當書吏。並著都察院堂官滿漢科道。留心查察。如有役滿逗遛。及地方官容留疏縱等弊。隨事隨時。據實嚴參究辦。○十一年奏准。在京各衙門。嗣後有役滿。及告退革退書吏。務將現住地方。確切查訊。於咨文內敘明。行知都察院查照。劄飭各該城司坊官。押令回籍。並報明起程日期。以便查覈。○二十八

年

諭。役滿書吏。身後辦事。最干例禁。必應飭令回籍。惟年久未見巡城御史查拏一人。可見稽察保甲。並未認真辦理。著步軍統領衙門。順天府五城一體訪察。驅逐。以除積蠹。而杜弊端。○同治五年

諭。各衙門已滿書吏。例應勒令回籍。無如日久視為具文。革吏退吏。輒在京師盤踞。與外省院司書吏。潛通消息。舞弊把持。亟應嚴行申禁。著各部院堂官。嚴飭司員。將無卯書吏。分別裁汰。如有滿退斥革吏役。仍敢進署干預公事。即行拏交刑部治罪。仍將每月滿

退斥革吏役姓名住址年貌移送該管地方衙門備查。並著五城御史嚴飭司坊官隨時查察驅逐以清積弊。

驅逐游惰。康熙五年覆准。五城司坊官及巡捕三營官查各該管地方有無業游手來歷不明之人。即送該城遞回原籍。仍查明犯事離籍情由擬罪。如該管官不行拏送。別經查出者。議處總甲等。並容留居住之房主。皆責三十板。十年覆准。凡無業之人在街道打手鼓踢石毬者。係旗人鞭五十。係民人責二十板。又定。凡

游手好閒之人。輪又舞棍。演弄拳棒。徧游街市。射利惑民。打降賭博。五城等官拏獲。將本犯照違制律治罪。仍枷一月。即行發落。遞回原籍。坊店寺院房主。容留不報。地保人等。不行查拏。皆照不應重律治罪。地方文武官失察。照例議處。○又定。凡唱秧歌婦女。及惰民妻。令五城司坊等官。盡行驅逐回籍。毋令潛住京城。若有無籍之徒。容隱在家。因與飲酒者。職官照挾妓飲酒例治罪。其失察地方官。照例議處。○雍正五年。諭京師為輦轂之地。地理宜肅清。但五方雜處。品類混淆。

往往有各省游手姦偽之徒。潛來居住。招搖生事。或呼朋引類。訛詐錢財。或捕風捉影。指稱緯路。或打探消息。囑託衙門。或捏造浮言。煽惑衆聽。以至開場局賭。誘人為非者。難以悉數。朕思京城內外。遠人聚集者。雖多。皆有容留居住之處。或在客店。寺廟。或倚親友居停。或租賃房屋。但就其住處稽察。自可得其蹤迹。如候補候選之人。必有仕籍可稽。至於讀書之人。或應試到監。或處館作幕。貿易生理之人。或行商坐賈。或工匠手藝。以及醫卜梨園。肩挑負販。皆必實有本業營生。方可聽其在京居住。若聞散游蕩。出入詭

祕託名餽口四方。而實無恆業。即係姦偽之徒。立宜  
擯逐。嗣後令步軍統領巡城御史順天府督率屬員。  
於九門五城地方。嚴加察訪。並出示曉諭京城內外  
客店寺廟。以及官民人等。凡有容留居住棲止之人。  
果知其行蹤來歷。可以深信。方許容留棲止。儻係面  
生可疑。蹤迹莫定。或人雖熟識。而生事妄行者。概不  
許容留居住。若徇情受賄。一時姑容。經該管官訪出。  
或本人日後事蹟敗露。必將容留居住之人。連坐治  
罪。其作何察訪。具保結之道。不使賢愚混雜。並令  
奉行得宜。不致滋擾。著九卿定議具奏。欽此。遵

旨議定。嗣後飭令五城司坊大宛二縣。凡客店庵院。不時稽察。取具並無容留來歷不明生事妄行之人甘結。以憑各衙門查閱。其通衢僻巷賃房居住者。令房主詢明保人來歷。並著兩鄰稽察。儻有此等游棍。該鄰佑房主協同斥逐。毋得徇情。若有徇情受賄容留者。本犯照律治罪。遞回原籍外。將客店庵院住持房主。一併懲治。該管官不行查出。照失察例議處。至編戶居民。住有常業。及候補候選讀書貿易諸色人等。確有憑據者。毋庸驅逐。儻有藉端勒索混擾良民者。照嚇



詐例治罪。

黜邪○順治十三年

諭朕惟治天下必先正人心。正人心必先黜邪術。儒釋道三教並垂。皆使人為善去惡。反邪歸正。遵王法而免禍患。此外乃有左道惑眾。如無為白蓮。聞香等教。名色邀集。結黨夜聚。曉散。小者貪圖財利。恣為姦淫。大者招納亡命。陰謀不軌。無知小民。被其引誘。迷罔顛狂。至死不悟。愚考往代。覆轍昭然。深可痛恨。向來屢行禁飭。不意餘風未殄。墮其邪術者。實繁有徒。京師輦轂重地。藉口進香。張幟鳴鑼。男女雜處。喧填衢

卷公然肆行無忌。若不立法嚴禁。必為治道大蠹。雖倡首姦民。罪皆自取。而愚蒙陷網。罹辟。不無可憫。爾部大揭榜示。今後再有踵行邪教。仍前聚會燒香。做錢號佛等事。在京著五城御史及地方官。在外著督撫按道有司等官。設法緝拿。窮究姦狀。於定律外加等治罪。如或徇縱養亂。爾部即指叅處治。○康熙五年定。凡邪教惑眾。該司坊官不行嚴禁。五城御史不行糾叅。一併議處。○十六年題准。凡捏造俚歌。列刻傳頌。沿街唱和者。內外地方官即時查拿。照不應重律治罪。若係妖言惑眾等詞。照

律擬罪。○十八年議准。凡迎神進香。鳴鑼擊鼓。肆行無忌者。為首之人。照邪教惑眾律治罪。為從者。枷三月。責四十板。不准折贖。五城御史及司坊官不行查拏。分別議處。○二十六年覆准。無賴狂徒。假借僧道為名。或稱祖師降乩。或妄逞邪說。託言前知。或以虛妄之談。盡惑愚蒙。至有羣相禮拜。甘作徒從者。此等邪教。行令五城官嚴行禁止。○四十八年覆准。凡鳴鑼擊鼓。聚眾燒香。男女混雜等弊。曾經嚴禁。恐相沿日久。舊俗復熾。再扶鸞書符。招搖賣緣之輩。概永行

禁止違者該司坊官究治。○雍正二年題准婦  
人成羣聚會。往寺廟進香者。令五城司坊官嚴  
禁。○又覆准除軍民妻女禁止入廟燒香。及扮  
神賽會外。其民間春秋里社祈報者。不在此例。  
由都察院分析出示。並令司坊官明白曉諭。○  
三年奏准。凡妄布邪言。書寫張貼。煽惑人心者。  
令五城司坊官不時嚴拏。○又奏准。凡坊肆市  
賣一應淫詞小說。在內交與都察院等衙門。轉  
行所屬官弁嚴禁。務按板書。盡行銷毀。有仍行  
造作刻印者。係官革職。軍民杖一百。流三千里。

市賣者杖一百。徒三年。買看者杖一百。該管官  
弁不行查出。按次數分別議處。仍不許藉端出  
首訛詐。○乾隆十年奏准五城街衢牆壁間。術  
士多貼淫戲穢惡之方。巧立名色。哄騙少年。迷  
惑浸淫。害人匪淺。飭令該司坊官嚴行驅逐。○  
二十七年奏准五城寺廟僧尼開場演劇。男女  
概得出資隨附。號曰善會。敗俗釀弊。所關匪細。  
應交步軍統領五城順天府各衙門嚴行飭禁。  
儻有設為善會煽聚婦女者。立將該廟為首僧  
尼查拏治罪。至有職人員罔顧官常。濫與廟會。

及縱容妻妾入廟。一經查實。指名糾參。○三十三年奏准。五城內外。如有前經入天主教之人。許其自首免罪。儻別經發覺。按律重懲。○三十四年議准。朝陽門外東嶽廟道衆。指定每月初二十六為婦女入廟之期。男女混雜。應將初二十六婦女廟期名色。永遠禁革。並令該廟道衆。出具甘結。嗣後旗民婦女。有指稱廟期燒香者。概行查禁。儻有仍前違犯者。立即根究。照律將本婦夫男及該廟道衆等治罪外。並將失察之該管文武地方官。一併議處。○四十九年奏准。

紅陽教經卷。令步軍統領衙門及五城司坊各  
官。嚴行查禁。不得存留。○嘉慶五年

諭朕恭閱

皇考高宗純皇帝實錄內載小民知識短淺。種種惑於  
鬼神。祈求禱祀。為費不貲。如越省進香一事。程途則  
有千餘里。及二三十里之遙。時日則有一月及二三  
月之久。以有限之蓋藏。坐耗於酬神結會之舉。直隸  
山東山西陝西等處風俗。大半如此。而河南為尤甚。  
著各省督撫。訪察所屬。有越省進香者。善為化導。徐  
徐轉移。毋得呼朋聚眾。跋涉山川。以致誤農耗財。漸

成人心風俗之害。仰見

皇考牖民善俗。諄諄教誡至意。朕在藩邸時。即素知民間有赴髻髻。山天台山等處進香之事。而近京各省相習成風。亦所不免。往往千百為羣。填塞街道。其間男女雜處。姦良莫辨。不獨耗費錢財。且恐別滋事端。風俗人心。殊有關繫。在蚩蚩者。氓於福善禍淫之理。不能深曉。每以進香虔禮。即可迎邀福祐。又或遇父母疾病。許願酬神。以冀速痊。殊不知父母有疾。正當親身侍奉湯藥。焉可越境遠離。而神靈隨處降格。即於本境祠廟。虔誠祝告。亦無不可。况小民果能竭誠



侍親諸惡莫作。衆善奉行。自蒙神祇默佑。又何必遠  
勞跋涉。為此無益之祈禱乎。是此等酬神之事。其始  
原為求福免禍起見。但分途四出。結隊成行。其為會  
首者。藉此斂錢滋事。日久相沿。人數衆多。漸至流為  
邪教。此而不嚴行禁止。何以正人心而厚風俗。嗣後  
京城內外及各直省。所有民間一切越境酬神聯羣  
結會等事。俱著該管衙門及各督撫等。出示曉諭。嚴  
行禁止。違者按律懲治。○七年

諭朕恭閱

皇考高宗純皇帝實錄內載乾隆十八年七月。欽奉

諭旨。滿洲習俗。高樸。自我朝一統以來。始學漢文。曾將五經及四子通鑑等書。繕譯刊行。近有不肖之徒。不繕譯正傳。反將水滸西廂記等小說。繕譯。使人閱看。誘以為惡。甚至以滿洲單字還音。鈔寫古詞者。俱有滿洲習俗之偷。皆由於此。不可不嚴行禁止等因。欽此。仰見我

皇考崇正黜邪。為風俗人心計者。至深且遠。從前滿洲盡皆通曉清文。是以尚能將小說古詞。繕譯成編。

皇考深恐為習俗之害。嚴飭禁止。今滿洲非惟不能繕譯。甚至清話生疏。不識清字。其粗曉漢文者。又以經

史正文。詞義深奧。難於誦習。專取各種無稽小說。日  
事披覽。而人心漸即於偷。此不獨滿洲為然。漢人亦  
更多蹈此陋習。如經史為學問根柢。自應悉心研討。  
至諸子百家。不過供文人涉獵。已屬藝餘。乃鄉曲小  
民。不但經史不能領悟。即子集亦束置不觀。惟喜贅  
詞俗劇。及一切鄙俚之詞。更有編造新文。廣為傳播。  
大率不外乎草竊姦究之事。而愚民之好勇鬪狠者。  
溺於邪惡。轉相慕效。糾夥結盟。肆行淫暴。概由看此  
等書詞所致。於世道人心。大有關係。不可不重申嚴  
禁。但此時若紛紛查辦。未免假手吏胥。轉滋擾累。著

在京之步軍統領順天府五城各衙門。及外省之各督撫。通飭地方官。出示勸諭。將各坊肆及家藏不經小說。現已刊播者。令其自行燒毀。不得仍留原板。此後並不准再行編造刊刻。以端風化而息詖詞。○十

七年。

飭令五城御史。嚴禁開設會場。招搖婦女入寺。○十八年。

飭令五城御史。如有擊鼓鳴鑼。揚幡賽會者。將為首之人。嚴拏懲辦。○又

諭居民人等。如有家存姦盜邪淫小說。及違礙經卷。或

自行燒毀。或呈繳到官。巡城御史衙門彙送軍機處。驗明查鎖。○咸豐二年

諭。京西妙峯山廟宇。每於夏秋二季。燒香人衆。有無賴之徒。以走會為名。裝演雜劇。以致男女混淆。於風化殊有關繫。著西北城各御史先期出示曉諭。如有前項匪徒。即行拏究懲辦。仍不准差役人等藉端擾累。

○同治三年

諭。近日京師地方。竟有施用邪術。迷拐幼小子女。輾轉售賣。為害閭閻。著五城嚴密查拏。如有不法匪徒。用藥迷人。及施用邪術。誘拐子女。輾轉略賣者。一經訪

獲訊實。即行奏明。立予正法。以靖地方。○光緒十一

年

諭。御史張廷燴奏京師城外白雲觀。每年正月間燒香賽會。男女雜遯。並有託為神仙之說。怪誕不經等語。僧道造言惑眾。及婦女入廟燒香。均干例禁。嗣後著該管地方官嚴行禁止。其餘京城內外各寺觀。如有燒香賽會者。亦著隨時查禁。

煙禁。○乾隆四十一年

諭。據曹學閔奏請禁水煙一摺。雖屬無關緊要。但火煙已屬無益。因相沿日久。未便飭禁。今更流為水煙。尤

非所宜。著交步軍統領衙門暨五城御史概行禁止。並著甘肅等省一體飭禁。○嘉慶十二年奉

旨。恭阿拉奏朝陽門查獲私帶鴉片煙之楊姓請交刑部審辦一摺。所奏甚是。鴉片煙出自閩粵兩省。最為風俗之害。久干例禁。該犯楊姓膽敢攜至京城地方私賣。殊屬可惡。著交刑部將該犯從何處販運。茲來京費與何人。嚴加訊究。務得確情。按律定擬具奏。並著五城嚴密查察。如有私帶鴉片煙潛行售賣者。即當拿究嚴辦。○十八年

諭。刑部議奏侍衛官員買食鴉片煙者革職杖一百加

加號兩箇月。軍民人等杖一百。加號一箇月。均著照所議辦理。其各處輾轉營販之徒。並著五城順天府步軍統領衙門。及各直省督撫等。一體嚴查。按律究辦。○二十二年

諭聞近日都城中有以水煙入市售賣者。甚至每歲隨往熱河。逐隊營趁。不可不嚴行禁止。著五城出示曉諭。各令改業營生。如有不遵。查拏懲辦。

因積○雍正四年

諭聞京城近日米價騰貴。恐有姦人囤積射利。擾亂情弊。著都察院轉飭五城曉諭各行戶等。不得高價勒



索有因積遏糶不遵勸諭者。五城御史密行訪察。從重治罪。再將京倉米發五萬石。分給五城。每城領米一萬石。立廠委員平糶。俟市價平減。即行停止。將餘米存貯該城。市價一貴。即將此米平糶。以濟窮民。

乾隆二十五年

諭。上年因得雨水稍遲。糧價易致增長。是以節次酌設五城各廠。米豆草束。多方籌畫出糶。以平市價。而麥麵一項。至今源源接濟。所有現在麥價。尤當日就平減。乃據順天府尹奏報。現今時價。較上半月每石加增三錢。此必其中姦商市販。巧為牟利。以致翔貴。若

此國家立法調劑。原屬因時制宜。非可援為定例。且前經降旨。將官員俸祿。先行借放。原期未石倍為充裕。而商販等乘時落價。收買存積。及至支放已停。則乘機昂價獲利。在在有之。京城重地。設官糾察。彈壓至為詳備。願任一二刁民乘間居奇。甚至齊行把持。累及閭閻口食。而莫之懲儆可乎。若步軍統領衙門。會同五城御史。順天府。嚴行飭禁。如有藉此多收囤積高擡市價者。即行查拏究處。以為逐利病民者戒。

○三十七年奏准。嗣後查察市價長落。惟在實力嚴拏。囤積齊行。不稍寬縱。俾閭閻長受平價。

之惠。至於開張鋪面。逐日交易。原不必繩其多寡。以冀商販流通。○五十二年奏准。嗣後各鋪戶存米。不得過五十石。視年歲豐歉。隨時量加增減。儻各該商等。仍敢玩視。居奇。一經查出。除將未參入官。仍將該商等從重治罪。○五十九年奏准。米商鋪戶。囤積居奇。遇有兵丁等需用銀錢之處。向其借貸。輒將米領米石。先期賤價押買。謂之短米。及屆各倉放米之期。該鋪戶等。串通領催車戶。及倉書斗級。包攬冒領。或參佐領等。素與往來。曲為徇隱。殊干嚴禁。應交步

軍統領衙門順天府及五城嚴行出示。如鋪戶人等。現在有將兵丁米石違禁豫買者。除將應領之米。飭令該兵丁自行赴倉關支外。將兵丁責處。其用過鋪戶銀錢。不准償還。如姦商等仍敢索討。或參佐領等為之調停了事。許兵丁等自行出首。將索債人從重治罪。該參佐領嚴行叅處。以清弊端。○嘉慶五年

諭京師米糧。無論官民鋪戶。一概不准出城鬻賣。久經嚴行飭禁。但恐各衙門奉行日久。稍有廢弛。現在漕米將次抵通。兌竣京城米糧。任聽門軍車戶米鋪人

等私販出城。難保無向串挪移之弊。並恐市僧之徒。居奇囤積。以致米價漸昂。實於民食有關。自應重申禁諭。著步軍統領並順天府五城各衙門。酌派番役人等輪流查察。如有私販出城。及囤積各弊。俱當嚴行禁止。該衙門等經此番嚴禁之後。務須實力奉行。久而無懈。儻番役人等藉稽察之名。任意訛索。滋生事端。一經訪聞。必將該管各官及番役人等。分別嚴辦示懲。不稍寬貸。○又奏准五城各鋪戶。所有米麥雜糧等項。每種不得過八十石。逾數囤積居奇者。照違

制律治罪。○六年奉

旨。京師五城各鋪戶。所存米麥雜糧等項。定例每種不得過八十石。儻逾數因積居奇。即照違制例治罪。但念小民無知趨利。若照定數止准存貯八十石。違制罹法者必多。嗣後各米鋪存貯各種米麥雜糧俱准存貯一百六十石。以便流通糶賣。其現在所餘糧石。若按全數入官。該鋪戶等必致虧折資本。著五城御史查明各鋪戶存貯糧石。除現定額數。每種准積至一百六十石外。餘俱加恩准其平價糶賣。不許囤積。該吏役等亦不得藉端滋擾。致干咎戾。○十五年

論。御史興安奏請將鄉民糴買細米准令出城一摺。向

來粗米不准顆粒出城。所以杜回漕之弊。法至善也。升斗細米。原准鄉民入城糴買。以資口食。本不在禁止之例。乃近日該營員等。往往規避處分。概行攔阻。以致實係附近鄉民買食細米。亦一概不准出城。殊於小民生計攸關。著步軍統領衙門。通飭各營員及城門領催等。嗣後該商戶等。如有偷運販賣及囤積牟利等弊。該地方文武員弁。自當隨時實力訪拿。其附近居民糴買細米。數在一石以內者。著照舊定章程。准其出城。毋得攔阻。○十八年奏准。嗣後五城鋪

戶開設通衢。流通糶賣。間有賣少存多。並非有心滋弊者。雖在一百六十石之外。亦當體察情形。以昭區別。如租賃廟宇民房堆儲。隨時糶賣。即係囤積居奇。雖不及一百六十石。亦當嚴行查禁。





欽定大清會典事例卷一千三十九

都察院

五城

私鑄 私銷 嚇詐 拐騙 違例放  
債 霸占 禁止 謠言 賭博 闖毆等

紀件

收管 煤窯 火房 藏造 軍器 戲館 經  
馬匹 耕牛 保結 取保

私鑄。順治十四年議准。凡失察私鑄。五城坊官一起降一級。掌印兵馬司二起降一級。五城御史不行查叅。一併議處。○十八年議准。凡失察私鑄。五城坊官一起降二級。二起降四級。皆調用。三起革職。掌印兵馬司一起降一級。二起降二級。三起降三級。皆調用。四起革職。五城御

史不行查參。以疏忽治罪。○康熙二十三年定。五城地方姦民私鑄。及銷毀制錢之人。若別經拏獲。將失察之五城官員。皆照處分錢局官員例議處。○二十九年覆准。凡攬和私錢行使之人。查拏被獲。係旗人。鞭八十。係民人。責四十板。京城外責令五城司坊官。京城內責令大宛二縣。嚴行查拏。若仍有攬和私鑄者。將該管官每起罰俸一年。○三十六年議准。嗣後銷毀制錢私鑄販賣。該管官自行緝獲。免其論罪。如不行查出。五城坊官。不知情者。一起降三級調用。二

起革職。掌印兵馬司。不知情者。一起降二級。二起降四級。皆調用。三起革職。五城御史。一起罰俸一年。二起降一級。三起降二級。四起降三級。皆調用。五起革職。○雍正三年議准。凡五城司坊官。但能拏獲私鑄者。不論年月遠近。概免處分。文職拏獲。准免武職處分。武職拏獲。准免文職處分。果能實心查拏。不論本管地方與否。視拏獲之多寡。量予議敘。若仍前怠玩。仍照舊例處分。○乾隆五十九年奏准。現在京城小錢未能淨盡。交步軍統領衙門五城。順天府一體出

示查禁。立限收繳。照例給價。並令換錢經紀。通傳各鋪戶。不准將小錢攙雜入串兌換。並隨時查揀。儘數呈繳。仍交步軍統領各衙門。不時查察。毋許吏胥人等藉端擾累。○六十年。

飭令五城御史。將私鑄小錢。俱令依限呈繳。○道光四年。

飭令五城御史。嚴禁牟利之徒。不得於局鑄大錢。攙和短數。○光緒四年。

飭令五城御史。嚴拏私鑄。毋壞錢法。○又

飭令五城御史。於京城各門。令所屬認真稽察。毋任

私錢偷運入城。九年。

飭令五城御史嚴拏擺設地攤。及回民蠟鋪將私錢加底換票等弊。以免銷毀改鑄。

私銷。康熙五十六年定。錢局收買舊器。廢銅小民圖利。致將制錢毀壞變賣。嗣後停其收買。行令五城嚴緝毀壞之人治罪。雍正五年奏准。凡銷毀制錢地方。密行嚴查。毋致潛藏。如怠忽疏縱。該地方官革職。九年議准。京城鋪戶。有將制錢之邊。磋捶令薄。攪和兌換。鎔化銅末取利者。五城御史查拏治罪。十三年十一

月

論京城中姦徒銷毀制錢。著地方官密訪嚴拏。毋稍疏縱。儻仍視為具文。將該管官重加處分。不稍寬貸。○乾隆二十四年奏准。向來米行均以銀交易。近時俱用錢文。源源而往。是大銷耗之一大端。此必有姦商在四鄉收買。巧為販運。令順天府五城一體查禁。出示曉諭。嗣後鄉民糶賣糧價。仍用銀兩。不得多載錢文。違者即嚴拏治罪。其有零星載負。賣得錢文在三五千。及十千之內者。不得查禁。載運數十千至一二百千。即行查拏。

分別治罪。仍將錢文照市價發賣。並嚴禁官役人等。不得藉端滋事。擾累地方。一經訪獲。嚴加究治。○咸豐十一年。

飭令五城御史。查拏私銷人犯。暨私設錢攤之人。並嚴禁販錢出城。○同治元年。

飭令五城御史。嚴拏私銷姦徒懲辦。

嚇詐。○康熙十一年題准。惡徒借事挾詐。勒索錢財。公同搶奪。擾害地方者。責成該司坊官。不時巡緝。如知情徇庇。及失察者。分別議處。○雍正二年議准。凡部院吏役人等。有指稱打點衙



門名色招搖撞騙。及向拘禁在官之人。恐嚇勒詐財物者。久干禁例。令五城御史實力奉行。訪拏懲治。○乾隆三十五年奏准。凡五城地方惡棍。在街衢藉端訛索詐騙。攪擾市肆。行兇不法等事。司坊官一有見聞。即行拏究。如知情不即嚴拏者。革職。得財私縱者。交刑部治罪。不知情者。將該管之司坊官降一級留任。巡城御史罰俸六月。○五十年奏准。嗣後都察院堂官及五城御史長隨。散帖請分。永行禁止。許令出分之人。自行呈首。如有不遵。一經發覺。將與者受者

一體治罪。○光緒四年

翁御史戈靖奏請禁官差訛索一摺。京師地面各衙門。設立官差。原所以供緝捕。若如該御史所奏。在官差役。往往與賊相通。容隱分肥。輒以起賊為名。轉相誣陷。昨有中城水局官人。帶領獲賊。誣拏成衣舖杜姓拷問。並按去銀錢之事。尚復成何事體。著步軍統領衙門。順天府五城。議定章程。嚴行禁止。並甄別紳董賢否。以期得人。遇有公差訛索。即行從嚴懲辦。○又

諭。御史田翰堉奏棍徒指官嚇詐。請飭嚴禁等語。著

步軍統領衙門順天府五城嗣後遇有傳訊之案。按票蓋印。並錄案由及原告姓名。以防假冒。如查有兵役藉端嚇詐情弊。即著送交刑部。從重治罪。

○九年

諭。御史劉恩溥奏滿漢科道賢否不齊。難保無宵小私作摺底。藉名撞騙等語。此風斷不可長。嗣後如有攜帶摺底向人恐嚇者。准將原人原稿扣住。立即送交該地方官。從嚴究辦。以儆刁風。

拐騙。○康熙二年題准。八旗買賣人口。兩家赴市納稅記冊。令領催保結列名。若係漢人。令五

城司坊官查有該管官印票者准買。永著為例。

○六年

諭。凡搶奪婦女。拐騙幼子。此等姦惡之徒。嚴行五城查拏。從重治罪。如所屬地方不行查拏。將該管巡緝官治罪。○又議准。凡聚眾搶奪路行婦女。及以藥餅撲項邪術迷拐男婦子女。或賣或自為奴婢者。審實。凡夥謀之人。照光棍例皆擬斬立決。買者知情。減正犯一等。不知情者不坐。失察之五城司坊官議處。○二十三年定。凡私設窩子。誘拐人口之犯。令五城等官嚴行查拏。務盡其類。以靖

地方。若不行查拏。照錢局官處分例議處。亦不得藉名查拏。妄擾良民。○雍正七年議准。嗣後民人幼孩迷失。收留之人。呈報該司坊官。該司坊官傳人認領。即報明刑部。若收留不報。照誘拐例治罪。○乾隆二十五年覆准。嗣後迷失幼童案件。在內城者。即時稟報該管地方步軍校。即日轉報步軍統領。行順天府。並各該管衙門。外城即時報明該城。並各該管衙門。報到之日。一面行知內外看守城門官兵。加意盤詰。一面飭屬選差躡緝。並通飭內外城附近地方官弁。

一體稽查。嚴緝務獲。如該管官弁據報不即轉呈關緝。以致遲誤者。照推諉事件例議處。並通行京城內外各衙門。嚴飭所屬於偏僻處及交界地方。實心查緝。使兇徒不致漏網。緝獲之日。審係迷拐。將失察員弁。照例分別議處。其鄰境地方員弁。有能盤獲迷拐之犯。量予紀錄二次。以示鼓勵。

違例放債。乾隆二十三年議准。嗣後在京放債之人。凡有通挪借貸。務遵定例取息。按年計算。其三月倒票刀風。交步軍統領。五城御史出

示曉諭。永行禁止。如示禁之後。仍有短票盤剝情弊。查訪確實。即行嚴拏。交部治罪。其銀入官。借債之人。許其自首免罪。○嘉慶四年。

飭令五城御史。嚴懲牟利之徒。不得向候選官員。私用短票折扣。重利盤剝。○二十五年。

飭令五城御史。嚴禁私設帳局。向候補候選官員。勒捐盤剝。○道光十三年。

飭令五城御史。嚴禁姦商出放官債。重利盤剝。

霸占。○雍正八年議准。嗣後五城地方。私立水窩名色。分定界址。把持賣水。不容他人擔取者。

照把持行市律治罪。該地甲役。知有私立水窩。不即舉報者。照不首告律分別治罪。該司坊官不行嚴禁。照約束不嚴例議處。○又議准。五城地方民人。有喪葬婚嫁等事。須用人夫車轎。悉聽本家自行雇覓。如有私分地界。霸占損擡。多取價值。不容本家雇覓者。立拏枷示兩月。杖一百。仍令司坊官曉諭。永遠遵行。該地甲役。知有損擡攬頭。不即舉報者。照不首告律分別治罪。該司坊官不行嚴禁。照約束不嚴例議處。○又定。凡京城無帖鋪戶。如有私分地界。不令旁人



附近開張。及將地界議價若干。方許承頂。至發賣各項貨物。車戶設立名牌。獨自霸攬。不令他入攬運者。各枷兩月杖一百。○乾隆三十五年。奏准。京城向來食水之家。俱係挑水人占定二三十家。或十餘家不等。起自何人挑送。即成為世業。並可輟轉售賣。設挑水人他往。或爭長價値等事。稍不遂欲。即勒指食水之家。不准另雇他人挑送。實為相沿惡習。嗣後由五城御史嚴加革除。凡各井挑水者。如有把持多家。任意增價。及作為世業。轉相售賣者。令該戶呈首。或經

查出。即照把持行市例治罪。○嘉慶十三年。

飭令五城御史嚴禁各行公議擡價。

禁止謠言。○雍正元年覆准。書吏提塘人等除紅本。

上諭外。如有訛造無影之辭者。該司坊官嚴行查拏。

○二年議准。吏兵部科衙役。及各省報房探聽事件。捏造言語者。該司坊官嚴行查拏。○十三年奏准。嗣後無論事之巨細。若非據實首告。編造歌謠詩詞。黏貼街巷者。五城御史拏送刑部治罪。○光緒八年。

諭。近來投遞匿名書信。不一而足。甚至刊刻成書。以絕無根據之詞。肆口誣讎。顛倒是非。淆亂觀聽。於朝政大有關係。著五城御史出示嚴禁。嗣後如有向京官私宅投遞匿名書信者。即將來人送交刑部。嚴行究辦。以儆刁風。

賭博鬪毆等件。康熙十五年議准。凡失察賭博之司坊官。每起罰俸一月。二起巡城御史罰俸一月。三十年覆准。凡有造紙牌骰子者。該司坊官嚴行查禁。京城現有之紙牌骰子。限一月內銷毀。雍正元年覆准。凡有開鴿鷄圍關

雞坑蟋蟀盆並賭鬪者。該司坊官嚴行禁止。○  
三年奏准。凡開園鬪雞鶴鶉蟋蟀者。照開場賭  
博枷責例治罪。其該管官亦照開場賭博之該  
管官例議處。○十二年

諭五城司坊等官。各有管轄之地。越界拏人。固不免滋  
擾。然路遇鬪毆。酌酒拐騙。嚇詐之徒。若因地非管轄。  
遂置而不問。以致逃遁無蹤。亦非稽察整飭之道。似  
應不論何地。皆准其拘執。移送該城司坊官。聽詳該  
御史審訊發落。至曖昧隱僻不法等事。雖訪聞的確。  
猶非刻不可緩。則准其密詳該城御史查拏。並密詳

本城御史存案。如此庶無推諉。亦不致攬越。其應如何定例。著九卿議奏。欽此。遵

旨議定。嗣後五城司坊官。途遇鬪毆。酗酒騙詐等事。不論何城地方。均令當時拘執。押送該城司坊錄供。詳解該城御史審訊發落。一面報與本城御史存案。儻仍泥疆界。不即拘執。以致案犯脫逃者。巡城御史題參。照疏脫例議處。至曖昧隱僻。不法等事。各司坊官訪聞的確。亦不論何城地方。准其密詳該城查拏。仍密詳本城存案。均歸於各城造冊。送都察院註銷。儻該役藉端訛詐。

嚇索不遂。架辭妄稟。及司坊官擅作威福者。該城題參議處。再司坊各設捕役。專緝匪類盜賊。亦不得因非本管地方。明知故縱。竟不擒緝。儻有明知故縱。及受賄情弊。將該役治罪。該司坊官照疏。忽例議處。再五城地方。多與大宛二縣接壤。仍不分彼此地界。一例緝拏。○乾隆五年議准。正陽崇文宣武門內。皆係旗人居址。雖有民人錯處。而街道則有兵丁查看。堆撥柵欄。則有兵丁看守。又有步軍尉等直宿巡邏。不但五城捕役無可參置。即司坊官亦無從查問。是以

向例未曾設有巡役。遇有逃盜賭博等事。既無捕役巡察。則司坊官自不應一律叅處。嗣後正陽崇文宣武門內。五城分管地方。除人命及活傷驗報不實。照例各處外。其逃盜賭博等事。皆免司坊官失察處分。至正陽崇文宣武門外。五城分管地方。各設巡役。遇有人命逃盜賭博等事。令該役按地緝拏。如該司坊官有失察逃盜賭博等事。仍照例叅處。又議准捕役等如有受賄故縱。聚賭窩賭者。嚴加治罪。將失察之該司坊官議處。道光十九年奏准。步軍統領衙

門順天府五城於各旗營附近處所一體嚴查。遇有回民開局誘賭之事。拏獲究辦。○光緒九年。

飭令五城御史嚴拏兇惡痞棍。遇事生風。動輒羣毆之人。

收管。○乾隆二年奏准。嗣後刑部五城步軍統領衙門審擬竊盜。如係本京之人。交保甲收管。該地方官不時點驗。其不知籍貫者。分發大宛二縣安插收管。○十一年議准。嗣後安插人犯。除大宛二縣稽查外。如屬在五城者。該司坊官



一併點驗

煤窯。○順治十二年題准。西山過街塔山玉泉山。紅石山杏子口一帶煤窯。永行封禁。○康熙十年題准。燒稅累民。准予豁免。逐年應用之煤。照時價招商辦用。其煤窯事件。聽五城州縣管理。○五十二年題准。紅石山。蝎子山。自青龍橋迤北高兒山。破頭山楊家頂一帶。均關風水。行文五城等官。通行嚴禁。毋許採斫。若有將禁止之處。私行偷斫石料者。查拏治罪。嗣後如有修造之處。應用石料。著欽天監官前往踏看。果係

無關地脈之山。方許開採。又定西山一帶密  
通京城地方。內外官豪勢要之家。私自開窯燒  
煤。鑿山賣石。立廠燒灰者。問罪。枷一月發邊衛  
充軍。干礙內外官員。叅奏提問。○乾隆十一年  
議准。按楊家坨軍莊。在渾河以西。諸處煤窯甚  
多。在香山數十里之外。毫無關礙。仍照常聽民  
開採。其過街塔子公寺東西一帶。現有煤窯。為  
數無多。稽察尚易。且離香山外牆尚有數里。所  
有現在煤窯。仍聽開採。不必查禁。其廢窯內。如  
有情願復開。亦應聽民之便。此外附近過街塔。

如天台山。談玉邨諸處。如有請開者。令先呈明該地方官。詳報步軍統領順天府。委官確勘酌量辦理。○四十七年覆准。向例民間報開窩座。經地方官查驗後。給發循環印簿。令窩戶填註做工人花名。送地方官查覈。以杜潛藏匪類。但循環印簿。既假手於窩戶登記。不惟有名無實。且易啟胥吏藉端勒索之弊。嗣後如有可開窩座。屬京汛者。令該處民人具報步軍統領衙門查驗。屬順天直隸省者。由各該地方官轉報府尹總督衙門。派員查驗。即令開採。不必給予循

環印簿。以杜弊端。

藏造軍器。雍正二年

諭八旗盜甲器械等物。曾經禁止質當。今再嚴加禁約。交與八旗五城。以來年為限。儘經查出。將五城官員治罪。或有不肖之徒。藉此訛詐者。並應嚴禁。○十二年議准。嗣後民間鐵鋪內私造之鳥槍。及民間違禁隱藏之鳥槍。在京行令五城司坊官。勒限兩月。嚴行追出。交兩翼鐵匠局。如逾限不能追出。並民間有隱藏不行交出者。一經查出。將私造隱藏之人。並失察之地方官。照例分別治罪。

○嘉慶十八年。

飭五城御史嚴禁典鋪收當各營軍器。

戲館。康熙十年議准。京城內城永行禁止開設戲館。其城外戲館。如有惡棍藉端生事。該司坊官查拏治罪。○乾隆二十七年奏准。前門外戲園酒館。倍多於前。八旗當差人等。前往遊讌者。亦復不少。嗣後交八旗大臣步軍統領衙門。不時稽察。遇有此等違禁之人。一經拏獲。官員叅處。兵丁責革。仍令都察院五城順天府各衙門。出示曉諭。實貼各戲園酒館。禁止旗人出入。

○又奏准。在京如有需次人員。出入戲園酒館。不自愛惜名器者。交步軍統領順天府及五城御史。嚴行稽察。指名糾劾。以示懲儆。○二十九年奏准。五城戲園。概行禁止夜唱。○三十九年議准。嗣後無論城內城外戲園。概不許旗人潛往游戲。交各旗該管大臣。嚴切誡諭。隨時稽察。毋許違犯。並令步軍統領衙門及都察院轉飭五城御史。日派番役甲捕人等。巡緝訪查。如有旗人擅入戲園。除將本人照例懲治外。並將管束不嚴之該都統等。交部議處。○四十一年議

准。嗣後如有旗員赴園看戲。一經發覺。除將本人治罪外。並即查明。如係各部院衙門司員筆帖式等官。及各營官弁。即將該管之各堂官附參。交部議處。其本旗都統等。毋庸交議。如係參佐領等官。及閒散世職。即將該管之都統副都統附參。交部議處。若係驍騎校以下人員。並將該管參佐領一併議處。五十年議准。嗣後城外戲班。除崑弋兩腔。仍聽其演唱外。其秦腔戲班。交步軍統領五城出示禁止。現在本班戲子。概令改歸崑弋兩腔。如不願者。聽其另謀生理。

儻有怙惡不遵者。交該衙門查拏懲治。遞解回籍。○嘉慶八年

諭。嗣後著步軍統領衙門五城巡城御史。於外城開設酒館戲園處所。隨時查察。如有官員等改裝潛往。及無故於某堂某莊游讌者。據實查叅。即王公大臣。亦不得意存徇隱。○十二年

諭。給事中嚴烺奏現在雷雨未霑。請於齋戒期內。飭令大小臣工。凡遇喜慶等事。暫停演戲。並請敕下五城御史曉示各戲園。毋許演唱戲劇一摺。向例齋戒期內。原俱禁止演劇。况值望澤維殷。朕齋心籲禱。屬在



臣工仰體宵旰勤求。諒亦斷不出此。至外城戲園。於  
祈雨齋戒日期。未必盡能知悉。但當雨澤愆期之際。  
節次設壇祈禱。並降旨平糶倉糧。清理庶獄。凡所以  
關繫民瘼者。無不刻深縈慮。小民等自不當恣意燕  
樂。然未經明白曉示。伊等亦無由謹避。著五城御史  
豫行曉諭居民人等。凡遇齋戒日期。並祈雨齋戒及  
祭日。所有戲園。概不准演唱戲劇。以昭肅敬。惟所稱  
俟甘雨露足之後。再聽其便。此則不必。朕齋居默禱。  
昕夕虔祈。恪恭寅畏之誠。無時不仰希

昊鑒。豈閭閻所能深悉。若因朕心夙夜乾惕。謂民間皆

宜敬體此意。未免繩之太過。且恐民間以演劇營生者。轉致失業。向隅。覈之定例。亦未符合。嗣後若非齋戒之期。毋庸飭禁。○十八年

諭外城地面開設戲園。本無例禁。但演唱淫詞豔曲。及好勇鬪狠戲劇。於人心風俗。大有關係。著該御史等嚴行查禁。以端習尚。○道光四年奏准。凡太監等毋許在戲園酒肆飲酒聽戲。如有犯者。即責成該管營汛員弁及司坊官員查拏。送交內務府辦理。○又定。嗣後如有呈請建設戲樓者。俱不准行。○咸豐二年

諭京師五城。向有戲園戲莊。歌舞昇平。歲時燕集。原為例所不禁。惟相沿日久。競尚奢華。或添夜唱。或列女座。燕會飲饌。日侈一日。殊非崇儉黜奢之道。至所演各劇。原為勸善懲惡。俾知觀感。若靡曼之音。闕彼之技。長姦誨盜。流弊滋多。於風俗人心。更有關繫。著步軍統領衙門五城御史。先期刊示曉諭。屆時認真查辦。如仍蹈前項弊端。即將開設園莊之人。嚴拏懲辦。經紀。○乾隆五年議准。嗣後京城酒行經紀。除每兩應得用銀三分外。不得絲毫多取。賸削商民。違者司坊官查拏治罪。○咸豐八年

諭御史富稼奏請飭嚴禁錢市賣空一摺。據稱錢市舊規。各持現銀現錢。互相交易。近日市間多有憑空言買賣之人。並有官號影射買銀之弊。故銀價日昂。百物因之騰貴。著順天府五城立即嚴拏。照刑部新定章程懲辦。並將代保之經紀。一併嚴懲。

馬匹耕牛。康熙三十一年

諭一應馬匹。不許宰殺貨賣。著永行禁止。交與五城等官嚴查。如有宰馬賣者。拏送刑部。從重治罪。○雍正三年定。凡旗人將在京馬匹。販至外省發賣者。處絞。說合牙人。不分旗民。減一等科罪。該管佐

領等及該管五城司坊官不行查禁者。交部議處。○五年議准。嗣後宰賣偷竊耕牛。五城司坊官嚴行禁止。違者嚴拏照例治罪。○七年

諭聞民間竟有私宰耕牛之事。著該部步軍統領順天府府尹五城御史等。通行曉諭京城直省。並嚴行查訪。如有違禁私宰。立即鎖拏。按律究治。如該管官不實力嚴查。致有干犯者。定行從重議處。

火房。雍正十二年議准。五城及順天府。轉飭各司坊官。大宛二縣。令各處火房。設立循環簿。將逐日投宿之人。詳開姓名住址行業。十日一

報。僮有行止可疑之人。即令呈報該地方官。詢知住址。遞回原籍安插。僮不據實呈報。將開設火房之人。照不應律責處。僮遇有患病受傷身死之人。並不具報者。照移屍律治罪。地方官不行查出。照失察例議處。○乾隆二年奏准。從前火房。不許容留刺字之人。以致此輩無處容身。嗣後各處火房。許前項孤身無業之人宿歇。仍照例設循環簿稽察。○十一年奏准。五城御史轉飭各司坊官。將設立循環簿編查保甲之處。遵照雍正十二年及乾隆二年定例實力稽查。

嗣後開設火房之人。容留匪類。如有犯強竊案者。分別有無知情分贓例治罪。保甲人等。照所管內有為盜之人。贍徇隱匿例。分別責處。

保結。雍正三年奏准。凡部內題結軍流徒犯。及免死流犯。發遣以前。告稱祖父母父母老疾。家無以次成丁者。如屬五城民人。令掌印兵馬司指揮出結。巡城御史確查報部。若有捏出印結及受賄者。從重論。失察者。交部議處。其鄉約地方總甲十家長。兩鄰內有徇庇假捏出結者。杖一百。受財出結者。杖一百。徒三年。若地方官

出結後。上司復令查出。或原官查出。及鄉約人等首送者。除本犯仍行發遣外。官員及鄉約人等皆免議。其在人犯咨解到部之後。告留養者不准。○十一年題准。嗣後刑部更夫。行令五城召募。擇勤慎者准其供役。○又定。凡

陵寢採買米麥價值。及各部院須知雜糧價值。並由五城司坊官呈報。○又定。凡官員領憑在京病久。未能起程者。吏科批發該坊查驗。該坊據實驗明。出具印結報科。○又定。凡鑾儀衛校尉缺。於現役校尉親生子。及兄弟之子內。選擇堪用者。



充補。如校尉子弟不足。移交五城召募。該坊官查無過犯。身家殷實。民人出結保送。其每月應領工食。並出具印領。現由內務府於間散內揀補。○道光十

年

諭著步軍統領衙門順天府五城嗣後遇有錢鋪關閉逃走者。即將該鋪戶管事人等一併查拏嚴究。並咨行本犯原籍家屬名下。著落追償。毋任隱匿。其互保之錢鋪。先令代為開發。各該管地方官務當遵照定例認真稽查。有犯必懲。斷不可視為具文。任令姦商挖累閭閻。○同治三年

諭奎英奏外火器營兵丁領餉換錢請添保殷實鋪戶以資周轉一摺著管理火器營王大臣妥議具奏欽此遵

旨奏准所有藍靛廠外行錢鋪暫開寄存錢票應令其陸續收回仍請

旨准其挂幌數分飭令該管司坊詳細查明不必拘泥何鋪令其取具聯絡切實保結咨覆本營擇其最為殷實鋪商准其挂用錢幌以免層層牽制取保。雍正五年議准嗣後五城拏獲輕犯未經審理之先應行收禁者令該衙門照常收禁

若情罪甚輕。令取具的保候審。不必監禁。如有疏縱等弊。即將原保之人。一併究治。○乾隆四十一年議准。嗣後五城送部之案。如案犯住址。即在原址所管地方。仍發交原城司坊官取保。其餘各衙門移送案內。應行取保人證。如本無原城可發者。各按本人居址。坐落何城。即發交該城司坊官。就近取具的保。其由外省州縣提到。例不監禁人證。即令本人自舉其親識寓居所在。交城就近發保。若並無親識者。即交城看守。以上取保犯證。均令各司坊官當堂給領。仍

將保人姓名具文報部以憑查覈

